

■ COLUMNA

Gratulesch ... gratulesch ... gratulesch

DA MARIA CADRUVI

Per cas che Vus avais anniversari oz: jau gratulesch. Jau gratulesch era sche Vus avais l'emprim d'avrigl in giubileum da lavur, sche Vus festivais damaun Voss 30avel di da nozzas, sche Vus avais terminà dacurt ina scolaziun ubain sche Vus essas gist ventiraivlamain divorziads ed avais realisà la separaziun cun stil, format e respect. Pli veglia ch'jau vegn, pli savens ch'jau gratulesch e pli savens ch'jau aud auters a gratular. Il pled «gratulesch» vegn levamain ord nossa bucca. «Pli gugent gratular ina giada dapli ch'ina giada damain» para dad esser oz la devisa. E sez survegnir gratulaziuns n'è gea betg il mender che sa capitar. Nun ch'il motiv per las gratulaziuns saja totalmain dasperas, p. ex. sch'in chau blut survegn gratulaziuns per sia frisura nova, ubain sch'ina candidata betg elegida survegn gratulaziuns per las massa vuschs ch'ella ha fatg.

Adina n'èsi betg cler Aschebain ina gratulaziun è inditgada u betg. Mes saun giudizi di forsa gea, ma Knigge di na, ubain viceversa. In exempel: Lilli e Ken han empustà in auto nov. Il vendi-



der gratulescha ad els immediat suenter ch'els han signà il contract da compra. «Per propi avessan nus gi da gratular al vendider e betg el a nus», manegian els suenter, cura ch'els èn sulets. Ni in auter exempel. Ladina vegn tatta e quinta da quai cun grond plaschair. Cura duai jau gratular ad ella? Cura che sia feglia è en il terz, en il tschintgavel ubain pir en il settavel mais? E tge èsi sche jau na gratulesch insumma betg avant che l'uffant è qua? Mia tatta ha parturì 13 uffants. Pli probabel n'ha nagin gratulà ad ella avant ch'in uffant era naschì. Forsa ch'ils babs survegnevan pli baud insumma dapli gratulaziuns per lur figlianza che las mammas – perquai ch'els gievan pli bia tranter la glied. «Laschar far pisch il pop» aveva quai num

sch'ina naschientscha vegniva festivada en l'ustaria cun gratular e far printgas. In terz exempel: Roger ha fatg in referat. Il cumenzament m'ha persquadi fitg, cunzunt co ch'el ha resumà l'aspect istoric da l'entira chaussa. Ed el ha cundi ses plets cun umor. Ma la conclusiun ch'el ha tratg era tenor mai sbagliada e sia visiun per l'avegnir era fitg magra. Duai jau tutta-gratular? Duai jau «gratular cun resalvas» per esser vardaivla e sincera?

Avais Vus era gia gratulà? A Vus sez? Quai è sco quai ch'i para in bun ritual ed ina metoda eccellente per la psico-igiene. Avant che sa durmentar laschar passar revista il di e gratular ina giada u l'autra a sa sez per vairas prestaziuns: Per avoir gi il curaschi da finalmain far insatge ch'ins vuleva gia daditg far, per la fermezza da prender clera-main posiziun per ina chaussa impurtanta u per ina persuna ch'era en quest mument tut suletta, per la grondezza da siglir sur l'atgna umbriva, per la disciplina da taschair en ina situaziun nua che plets avessan purtà dapli donn che gudogn. Cun ni senza Knigge: tut motivs per era dir «jau gratulesch».

maria.cadruvi@spin.ch